

太平經卷之八

外八

太平經鈔辛部卷之八

外八

請問不食而飽年壽久久至于遂存此乃富  
國存民之道比欲不食先以導命之方居前  
因以留氣服氣藥之後三日小飢七日微飢  
十日之外爲小成無惑矣已死去就生也服  
氣藥之後諸食有形之物堅難消者以一食  
爲度食無形之物節少爲善百日之外可不  
食名不窮之道名爲助國家養民助天地食  
主少者爲吉多者爲凶全不食亦凶腸胃不  
通通腸之法一食爲適再食爲增三食爲下

四食爲腸張五食飢大起六食大凶惡百疾  
從此而生至大飢年當死節食十日之後大  
小腸皆滿終無料也令人病悉除去顏色更  
好無所禁防古者得道老者皆由不食君臣  
民足以安身心理其職富者足以存財貧者  
足以度軀君子行之善樂歲凶年不危亡夫  
人曰有三命而不自知日三食乃生朝不食  
一命絕晝不食二命絕暮不食三絕絕三日  
不食九命絕無匿物無寶留此由飢也姦邪  
大起悉從此始用吾道萬事自理吉歲可以

與利凶年可以存民常當忽帶收腸使利行步也

天地之間凡事各自有精神光明上屬天爲星可以察安危天地之性自有格法六甲五行四時節度可以占覆未來之事作救衰亂

防未然之事臣見君父之衰救之使其更興盛是大功也深知其衰也不救之或反言而去名爲倡詆罪不除也三事臣知其君有失將覩凶害而救之使其更無凶害是大功也知而不救名倡凶其罪不除也四事知君理

失其要意災害連起而救助其理之是其宜也為曉事之臣知而不救其罪不除也五事臣知其君年少其賢未能及事而救之助其為知是其宜也知而不助為賢反言不及名為不忠弱其上其罪不除也六事臣知其君

外八

二

老有天期而憂之為其索殊方大賢之助異策內文令君更得延年是大功也知而不能反言吉凶者其過大也七事為人下知上有危有失理或失忘而共救之案之是為大功知而不救自解避而去為不順忠孝之人罪

皆及其後八事父母有疾占相之知能盡力  
竭精有以救之知而不救天將大罰九事父  
母年老且盡爲子者知父母老期將至爲求  
賢師異方令得丁強孝子之宜也此由食人  
之食以食歸之而有大功也十事知人凶衰  
有大害患將至而救之使其更興與其竒方  
異策內文善事令無復憂苦是爲大功知而  
不爲有罪不除也夫爲人子見父母有死難  
而拋去之處樂違苦此乃與禽獸同耳豈可  
統三才繼天地乎是以聖人出也施教戒勸

人爲善斷絕凶惡以救天地之災今三光五行星辰順敘豈徒言哉今天上乃具出文書以化除諸災害以致善是故吾自曉勅真人出書也今天上教吾大言勿有蔽匿也今天地大周更始災害比當消亡無復餘糧類故

外八

三

教人拘校古今文集善者以爲洞極之經定善不可復變易也雖聖賢之人不能復致其文辭夫文辭天地陰陽之語也故教訓人君賢者而勅戒之欲令勤行致太平也所以言蔽藏者賢君得而藏於心用於天下育養萬

物而致太平也而歸功於上帝則堅於石室  
深穴也天生善物必歸之善處如珠玉也必  
帝王寶之其麤惡之物衆棄之況人爲善而  
天豈不愛乎帝王豈不重之乎今天上無極  
之天中無極之天下無極之天旁行無極之  
天今爲法況三道集氣共議其應天地人之  
位也乃太平至天悅喜則帝王壽其道神靈  
祐天地善氣莫不響應道德日至邪僞退詆  
臣斲冗滅凡臣悉除萬善自來五行和四氣  
時良其爲政法起於本本者天地之間人象



神神象人而各自有隅聚亭部鄉縣善惡所  
好所疾苦各有其本事皆近察察自相短短  
長得失明於日月故大教其集議賢不肖共  
平其事故天下州縣鄉里置封仰萬民各隨  
材作書直言疾苦利害可否致書投於封中

長吏更撰上天子令知民好惡賢不肖利害  
可集議而理之即太平之氣至矣而福國君  
萬民萬二千物各得所矣封即今匭函也

天道有緩有急人事亦然有緩有急天道急  
即風雨雷電不移時而至人道有急亦趨走

不移時而至急者即以時應天法則上之刺  
一通付還本事而有賞罰緩者須八月爲一  
日上也天上法如此夫陰陽爲法如此人道  
亦如此矣凡人腹中各有天子五氣各有王  
者天有五氣地有五位其一氣主行爲王者

外八

四

主執正凡事居人腹中自名爲心心則五臟  
之王神之本根一身之至也主執爲善心不  
樂爲妄內邪惡也凡人能執善清靜自居外  
不妄求端正內自與腹中王者相見謂明能  
還觀其心也心則王也相見必爲延命舉事

理矣不得見王者皆邪也不復與王者相通  
舉事皆失矣而復早終今太陽德盛欲使天  
上天下上無竟下無極旁行八洞外內真神  
真精光悉出助帝王治而致上皇洞平之氣  
未常見之善人命長萬物無復夭死自寃者  
而邪神悉消亡天下無復強枉病者豈可聞  
乎善哉子之問也天使悉斷邪僞凶惡而出  
真事凡圖書各有精神真事有真神邪事有  
邪神善事有善精神惡事有惡精神夫蓄積  
邪之家後必有邪害也蓄積真文真道之家

後必有度世者也故真偽各精所致也故天  
有吉有凶吉則吉精神凶則凶精神地亦有  
吉凶吉則吉精神凶則凶精神夫三皇五帝  
各有親屬兄弟三王五霸各自有親屬兄弟  
小小分別各從其類世興則高世衰則下比  
外八  
若晝夜相隨而起從陰陽開闢到今不止貧  
爲小人富爲君子更共相爲使轉相理是天  
地親屬也萬物不與其中幾類似之而實非  
也天有六甲四時五行剛柔牝牡孟仲季共  
爲親屬兄弟而敬事之不失其意以化天下

使爲善主仁義禮智文武更相爲親屬兄弟  
夫道與道爲親屬兄弟者凡道乃大合爲一  
更相證明轉相生今日身已得道凡道人皆  
來親人合心爲一家皆懷善意凡大小不復  
相害傷災害悉去無禍殃帝王行之天下興  
昌垂拱無爲度世命長吏民行之其理日明  
凡道皆出莫不生光道與道爲親屬傳相行  
故與道召道以道求道即以道爲親屬兄弟  
尚化如此則天下皆好生惡殺安得有無道  
者哉德與德爲親屬兄弟者今日身執大德

以德爲意凡有德之人推謙相事天下德人  
畢出矣以是爲法安坐無事帝王行之其國  
富吏民行之無所不理以德召德德自來矣  
仁與仁爲親屬兄弟者今日身爲仁凡仁者  
自來相求以仁召仁仁人盡來矣帝王行之

天下悉仁矣吏民行之莫不相親所謂仁與  
仁合爲一家是爲親屬兄弟矣義與義爲親  
屬兄弟者以義求義今日身已成義凡義之  
人悉來歸之以義合也帝王行之苦樂相半  
吏民行之生傷半以義求義是爲親屬兄弟

矣禮與禮爲親屬兄弟者以禮求禮今日身  
已成禮矣凡禮之人悉來行者守節生者不  
安腹中內空虛外使若環趨走跪起無聞命  
矣日短衣物盡單帝王行之愁苦且煩吏民  
行之職事紛紛丁者力乏老弱傷筋禮禮相  
親是爲親屬兄弟矣文與文爲親屬兄弟者  
今日已成文矣以文求文文人悉來至若浮  
雲中外積之聚若山至誠若少大僞出焉帝  
王行之以理其事或得或失吏民行之更相  
期妄以相拱害變疾病萬種人日短命以文

相期以文相恐轉相取轉相生此乃文之親  
屬也武與武爲親屬兄弟今日已成武矣以  
武召武凡武人悉來聚其氣陽陽其兵煌煌  
其力皆倍其目皆張其欲怒不得止武鬼居  
其角取勝而已不復惜其命君子行之其治  
日凶則吏民行之滅殺人世無有善意理有  
聚害此即以武生武則武之親屬也辯與辯  
相爲親屬兄弟者今日已成大辯矣凡有辯  
之人悉來歸之辯辯相與無有終窮一言爲  
百言百言爲千言千言爲萬言供往供來口



舌云亂無有真實人君行之其政萬端吏民  
無可置其命以辯求辯是爲親屬兄弟也法  
律與法律爲親屬兄弟者今日已成法律矣  
以法律求法律凡天下法律之人皆聚事無  
大小皆有治凡人無有無罪之人也自生至

外八

七

老一人之身有幾何罪過無有無罪者以此  
相生人君子之十九強死以此爲理天下大  
亂不可止也以此論親屬兄弟相求各從其  
類理亂之本太平之基審此九事可知也天  
上諸神言好行道者天地道氣出助之好行

德者德氣助之行仁者天與仁氣助之行義者天與義氣助之行禮者天與禮氣助之行文者天與文氣助之行辯者亦辯氣助之行法律者亦法律氣助之天地各以類行神靈也天將助之神靈趨之深思其要意則太平氣立可致矣

請問上善易爲也上惡易爲耶夫陽極爲善陰極爲惡陽極生仙陰極殺物此爲陰陽之極也夫凡民生不能盡力養父母求竒方道術以資父母使懷悒悒而至死復相教善衣

食歌舞以樂之是爲大逆之民天豈福之乎  
天上效凡書文對今天上爲法令天上人不  
得相期爲猾自有大術也地上亦然今真人  
豈知之耶自古到今多有是佞臣猾子弄文  
辭共欺其上愁其君父而得官位無功於天  
地而食祿天甚疾之地甚惡之天上名之亂  
紀今天上平氣至欲斷之恐此子復亂理今  
人積愚多可欺而得仕今天災不可欺而去  
也不可詐僞而除也真與僞與天相應不悉  
以示下古之人試使用之災害悉除即是吾

之真文也與天上法相應可無疑也不言而  
反日彰明矣用之而無成功吾道即僞矣亦  
不言而明矣天上爲法不效巧言乃效成功  
成事比若向日月而坐俱有光明何以知其  
熱與清乎去人積遠以何効之主以成功也  
向日而坐焮也足以知熱向月而坐足以知  
清吾之真文亦若是矣

外八

八

天上爲法目視則理陽瞑則理陰視則理有  
形瞑則理無形視則理人身瞑則理精神以  
是爲效故能使陰陽悉理則無有失職者也

地上亦然爲洞極皇平也今天之出書神之  
出策符神聖之文聖人造文造經上賢之辭  
此皆言也故天地神聖上士爲人盡力以言  
積年可立天地除災害帝王案用之乃致遨  
遊而無事上得仙度增年得天意子孫續嗣  
無有絕也世衰乃更爲大興天下仰命莫不  
得其天地六方八遠絕洞陰陽俱悅天病風  
雨爲時雷電不作日月更明三光不失度四  
時五行順行各得其所此神聖善言所致也  
其功莫不大哉

天上各異自有自然元氣陰陽與吾文相似  
各從其俗記吾書辭而行之即太平矣天上  
無極之三光各異自有自然元氣陰陽與吾  
文相似各從其俗記吾書辭而行之即太平  
矣天上中居各異自有自然元氣陰陽與吾

外八

九

文相似各從其俗記吾書辭而行之即太平  
矣天上三光各異自有自然元氣陰陽與吾  
文相似各從其俗記吾書辭而行之即太平  
矣天上雲氣各異自有自然元氣陰陽與吾  
文相似各從其俗記吾書辭而行之即太平

矣天上音響雷電各異自有自然元氣陰陽  
與吾文相似各從其俗記吾書辭而行之即  
太平矣天下風雨各異自有自然元氣陰陽  
與吾文相似各從其俗記吾書辭而行之即  
太平矣天下居中風雲氣各異自有自然元  
氣陰陽與吾文相似各從其俗記吾書辭而  
行之即太平矣地上蛟行各異自有自然元  
氣陰陽與吾文相似各從其俗記吾書辭而

行之即太平矣地上草木各異自有自然元  
氣陰陽與吾文相似各從其俗記吾書辭而  
行之即太平矣地上山阜各異自有自然元  
氣陰陽與吾文相似各從其俗記吾書辭而  
行之即太平矣地上川谷水澤各異自有自

然元氣陰陽與吾文相似各從其俗記吾書  
辭而行之即太平矣地下各異自有自然元  
氣陰陽與吾文相似各從其俗記吾書辭而  
行之即太平矣地下無極陰陽各異自有自  
然元氣陰陽與吾文相似各從其俗記吾書



辭而行之即太平矣五行各異自有自然之  
氣陰陽與吾文相似各從其俗記吾書辭而  
行之即太平矣四時各異自有自然元氣陰  
陽與吾文相似各從其俗記吾書辭而行之  
即太平矣六甲十干各異自有自然元氣陰

外八

十

陽與吾文相似各從其俗記吾書辭而行之  
即太平矣六甲十二子各異自有自然元氣  
陰陽與吾文相似各從其俗記吾書辭而行  
之即太平矣八方各異自有自然元氣陰陽  
與吾文相似各從其俗記吾書辭而行之即

太平矣神靈各異自有自然元氣陰陽與吾  
文相似各從其俗記吾善惡書辭而行之即  
太平矣如不從其本類教之即大亂矣志之  
哉天教吾具此文以解除天地陰陽帝王  
人民萬物之病也凡人民萬物所患苦悉當  
消去之故教子用法無極以示之乃拘校前  
後聖賢神文與凡人俗辭合而大考之後天  
地之病都得消除已消除帝王延年垂拱無  
憂也

天太陽也地太陰也人居中央萬物亦然天

者常下施其氣下流也地者常上求其氣上  
合也兩氣交於中央人者居其中為正也兩  
氣者常交用事合於中央乃共生萬物萬物  
悉受此二氣以成形合為情性無此二氣不  
能生成也故萬物命繫此二氣二氣交相於

外八

十一

形中故為善天地知之為惡天地亦知之故  
古者上善德之人乃內獨知天意故常方為  
善也

天讖曰復樂者樂復善者善復惡者惡復喜  
者喜復順者順復真者真復道者道復悅者

悅凡所復天地群神亦復之以影響哉復文  
者文復復僞者僞復復辯者辯復復佞者佞  
復復武者武復復逆者逆復復凶者凶復復  
邪者邪復凡所復悉天地群神復之凡吉凶  
安危之法在所復已凡人家力強者多畜私  
財後反多貧凶何也神人言此乃或多智反  
欺不足者或力強反欺弱者或後生一反欺老  
者皆為逆故天不久祐之何也然智者當苞  
養愚者反欺之一逆也力強當養力弱者反  
欺之二逆也後生者當養老者反欺之三逆

也與天心不同故後必凶也夫財者天地之間盈餘物也比若水常流行而相從常謙謙居其下得多財者謙者多得也故期者天不祐之矣

從天地陰陽中和三法失道已來天上多餘

算蓄積不施行何也願聞其意然天之受命上者百三十謂之陽曆閏餘也其次百二十謂歲數除紀也其次百歲謂之和曆物紀也人悉當象是爲年今失三法已來多不竟其年者餘算一歲一算格在天上人行失天道

無能取者今象吾文爲善行者天上悉且下  
此算以增之或得度世或延年矣天地  
已來帝王專以憂天下不平失職爲憂患也  
微此無可憂者也天下善人忠臣孝子悉共  
憂此但行吾文此憂除矣

外八

十二

天上言陽氣大興盛鬼物不得妄行爲害何  
也夫陽盛者陰必衰故物不得妄行爲害也  
誰禁之乎陽精禁之陽精何以禁之哉夫陽  
精爲神屬天屬赤主心心神乃天之神也精  
者地之精也鬼者人之鬼也地母也鬼子也

子毋法同行并處陰道太平氣至陽氣大興  
天道嚴神道明明則天且使人俱興用之神  
道用則以降消鬼物之道也神道興與君子  
同行鬼物道者與小人同行故君子理以公  
正神亦理公正小人理邪僞鬼物亦理邪僞  
明於同氣類也今陽道興火兵刃當消滅火  
厭之故兵積陰氣盛大積陽氣盛陽盛消兵  
自然感召也人生必因天氣上善者付天中  
善付於人下善付田畝故上士學而度世中  
士當理民下士當理田野上士當來雲氣中

士乘車下士當步行此三人各殊職不相妨  
害上士度世上天爲中和調風雨中士屬縣  
官當理人下士當理財產各有所職不相妨  
矣

天上諸學道之爲法也人精求道也已小合

外八

十三

於小道見諸神爲小得道門戶未合於中道  
乃得至於大道至於大道乃能致於真神也  
小合小道者致小神合於中道者致中神合  
於大道者致大神大神至乃得度世長存而  
至此皆有大邪神鬼不欲人度世善惑人致



急退而自言變怪真偽相雜當此乃能分別  
邪正則度世矣

天上名上士從生到終無一惡意乃爲凡人  
所愛五方人民縣官共賜之遺之中士乃爲  
隣里所愛隣里共賜之遺之下士無有善心  
意無可得賜遺但竊取其家私賜遺此天下  
人糝所爲何謂糝哉上士純善心意無惡是  
上陽也中士心意半善是其中陽也下士心  
意純無善是下陽也故名糝糝不成實內空  
無米爲無實信也無信實之人爲之糝人上

士得縣官四方賜與其家者言不忘本祖也  
中士得四隣賜與其家言不忘父母也下士  
反竊取其家財以付傍隣里者當象其牝內  
空外實反背其本也皆有害天上言背反其  
家家中不和悉由此人夫臣外交其國必空  
家人外交其家必空天之外咎皆從此起夫安  
危起於人腹中神靈見於遠方上下旁行洞  
達億萬里可不慎乎

太平道其文約其國富天之命身之寶近出  
胷心周流天下此文行之國可安家可富

天地格法善者當理惡正者當理邪清者當  
理濁不可以惡理善邪理正濁理清此反逆  
之令盜賊不止姦邪日生乃至大亂各從此  
起帝王將任臣必詳其選舉當以天心列宿  
合乃敢任之日者君德也月者臣德也若列  
宿不合必不能致太平姦邪生矣

外八

十四

說天地上下中央八遠郵亭所衣食止舍何  
等也作道德而懷疑者取決於此識今天上  
有官舍郵亭以候舍等地上有官舍郵亭以  
候舍等八表中央皆有之天上官舍舍神仙

人地上官舍舍聖賢人地下官舍舍太陰善  
神善鬼八表遠近名山大川官舍以舍天地  
間精神人仙未能上天者雲中風中以舍北  
極崑崙官舍郵亭以候聖賢善神有功者道  
爲首德爲腹仁爲足而行之天設官舍郵亭  
得而居之欲得天力者行道欲得地力者行  
德欲得人力者行人此三者無窮之路失此  
三者亂之本也不循此三者名逆天故聖人  
苞道德行仁過此而言屬萬物之行矣  
請問四時之神氣以助理致善除惡何者致

大神何者致中神何者致小神日思月建帝  
氣者致大神思相氣者致中神思殺氣者致  
小神思月建後老氣者致老物思月建後病  
衰氣者致邪鬼思月建後死氣者致純鬼思  
月建後破氣者致破殺凶惡咎害也生氣者

外八

十五

屬天屬陽屬前天道以神氣生故斗前六神  
皆生後六神屬地屬陰天道以死氣爲鬼爲  
物凶咎子欲使後世常謹常信自親自愛神  
明精氣不得去離其身則不知老不知死矣  
夫神明精氣者隨意念而行不離身形神明

常在則不病不老行不遇邪惡若神明亡病者立死行逢凶惡是大効也人欲不病宜精自守也凡事不過自然自然中無精神凡事皆不成神不過大道與天地之性中無大神尚皆不成不能自全故天地之道據精神自然而行故凡事大小皆有精神巨者有巨精神小者有小精神各自保養精神故能長存精神減則老精神亡則死此自然之分也安可強爭乎凡事安危一在精神故形體爲家也以氣爲輿馬精神爲長吏興衰往來主

理也若有形體而無精神若有田宅城郭而無長吏也夫長吏者乃民之司命也忠臣孝子大順之人所宜行也夫人之身而不忠於上不孝其親是負其身戮其刑亡其本也常思善精神集來隨人也思惡精神亦來集人也乃入人腹中隨趨人所思使惛悞不能忘之矣

請問胞中之子不食而取氣在腹中自然之氣已生呼吸陰陽之氣守道力學反自然之氣反自然之氣心若嬰兒即生矣隨呼吸陰

陽之氣即死矣

太平經鈔辛部卷之八





